

Diphetolo ka Seteišene sa Maphodisa

Ba-Mmasepala ba eteletse pele ke Meyara Ntate Tsheko Musolwa, ba-Sephodisa ba eteletse pele ke Motlatsatona Ntate Cassel Mathale, ba mošate wa gaMametša ba eteletse pele ke Kgošigadi Mametša a farafarilwe ke ba mphato wa gagwe gammogo le setšhaba sa The Willows ba hlwele ba kgobokane holong ya setšhaba ya The Willows. Tabakgolo ele diphetolo ka seteišene sa maphodisa mabapi le tumelano ya go agwa ga seteisene sa maphodisa tulong ya The Willows.

Meyara wa mmasepala wa Maruleng Ntate Tsheko Musolwa o hlalositse badudi ka botlalo lebaka-lekgolo la kopano ya letsatsi. Polelong ya gagwe o laeditše gore seteišene sa maphodisa seo se bego se swanetšwe go agwa motseng wa The Willows se fetoletšwe go agwa kgauswi le Mahlakung Complex. A bontsha gore mabaka, dintlha ka botlalo le dipotšišo tšeo di lego gona di tla arabja ke Motlatšatona wa sephodisa Ntate Cassel Mathale.

Maloko a setšhaba a filwe sebaka sa go ntšha sa mafahleng, gomme polelong tsa bona ba bontšha ka mokgwa wo ba sa thabelago sephetho seo ka ge ba be ba lebeletse menyetla yeo e ka tlogo le go agwa ga seteišene lefelong la The Willows. Motlatšatona o laeditše gape gore bao ba šupsago ka menwana e le go Meyara gammogo le makhanselara ka yena, ba šupsa ka phošo ka ge ba sa tsebe selo ka sephetho sa go fetolwa ga lefelo la go aga seteisene sa maphodisa.

Motlatsatona Ntate Cassel Mathale o hlalositse gore diphetogo di dirilwe ke Surveillance secretariat morago ga go dira dinyakišiso gomme a bontšha gore e ka se be maleba go tšwela pele go agwa seteisene sa maphodisa lefelong leo. Ba lefapa la sephodisa ba dumelana le setšhaba gore ka ge batho ba nyaka ditirelo go tla agwa seteišene sa motšwa-o-swere lefelong la The Willows.

Motlatšatona o ile a feleletša polelo ya gagwe ka go laetša gore badudi ba The Willows ba boletše go tlala seatla le go gatelela gore pono ya setšhaba ga se pono ya Lefapa la sephodisa, efela ba tla boela morago go rerišana ka mo go tseneletšego.